

懷德縣志第九卷 人物

目次

宦蹟

鄉賢

儒林

鄉型

寓賢

死事

列女

懷德縣志

卷九人物

十八

新京福文盛印書局印

懷德縣志第九卷

人物志

自太史公剏循吏儒林各列傳後世志人物者咸分類傳述以標志趣例至善也懷德人物古籍闕如開墾以來風俗沕穆設治而後文教昌明百餘年來耆德碩學勇士節婦亦間出焉爰采其事蹟昭然在人耳目者着於篇而以賢令政績列於前者重循良表實惠也述人物

宦蹟

張雲祥字集亭四川成都府華陽縣人光緒三年十二月二十二日履任當馬賊擾攘之後改立縣治之初公以與民休息爲

目的辦賊嚴而不酷行政簡而不擾上不應酬下無需索初文廟牆垣以甃砌之被風雨剝蝕漸就傾圮公獨捐廉易之以磚即今現在之繚垣八年夏新任之牌已懸示矣屬民聞知赴省籲留雖經駁斥而上憲仍默順輿情未行撤任是年十二月十八日委查事件九年三月二十七日回任十一年二月初八日始行交卸公在任七年士庶樂業民教相安

賀墳字筱泉山東登州府寧海州人光緒十二年八月十二日接任時懷邑尙無書院公捐廉俸千二百兩以爲之倡書院乃成士子賴之尤嚴於治賊聞報即捕獲即置諸法鄉保匿報亦從重責之真盜到案無倖免者民間細故一訊即結雖其中不無武斷而民免拖累亦不尠矣十九年十月二十三日交卸在

任七年盜賊斂跡惟使酒濫刑及門丁林某乘勢竊權不免爲政聲之累

陳衍庶字錫蕃安徽安慶府懷甯縣人光緒二十三年八月初十日接印自甲午之後馬賊又見蠕動公乃辦團練令商民籌欸設立練營以唐玉和爲統練分駐四鎮各鄉則視民多寡以定團丁名額大團三十名小團二十名均無餉糈自備軍火有事則聚無事則散並嚴查界內匪人以絕盜賊眼線遇有賊來練營邀擊就近各團輔之庚子之前境內賴此以安二十四年十月二十四日卸任

高暄陽字樸菴江西九江府彭澤縣人光緒二十五年七月二

十九日接印勸民積穀四千七百六十石創立社倉三十八所復捐廉購書五篋藏於書院以備士子觀覽二十六年四月二十六日交卸署事認真無敢欺蒙

慕昌治字平甫山東登州府福山縣人光緒三十三年六月初八日接印自高公創立社倉之後即經拳匪之亂加以日俄交關境內官事匆匆民情岌岌胥視社倉無關緊要公到任亢旱已甚下車伊始即以此事爲當務之急調查認真不遺餘力善舉不致中墮者於公有賴焉三十四年二月初二日交卸署印八月政由己出權無旁貸

廖彭字錢如貴州都勻府獨山州人光緒三十一年正月初九

日接印二月十二日被俄兵擄去蓋正月初五夜突有日人率胡匪三四百名轟毀二站東鐵路橋俄人忿甚因遷怒於地方官不知事在公接印前也擄至鐵嶺見彼達官事既白令回任值俄兵驟退挾與俱行抵三站因通事勾串俄弁禁於黑屋邑中尙不知公之所在也越數日幸有公益地局局員梁豐年等前往探詢彼等飽其欲始行釋放公在俄營往反二十日徒行露宿備極艱辛然當俄兵退入懷邑時公見彼軍官毫無餒色議論侃侃凡事必自任之俄官欲下鄉買車馬公力阻之飭令鄉牌代購民始賴以粗安至俄兵之強號糧草勒買牛豬不過通事勾引彼輩於中取巧然畏俄官知使無公力阻於前則騷

擾尤甚矣尤足稱者俄人在境通事坌集肆橫公誅李通事而漢奸乃畏威斂迹俄隊遣散後盜賊充斥爲害尤甚公復戮張四馬棒降隊始懾服此等作爲尤非俗吏所能無如俄人方去新任已來竟於三十二年二月十三日交卸去

卿士志

儲鎮字鐵生江蘇宜興人民國八年任下車伊始即詢閭閻疾苦知民之所最苦者惟盜爲甚於是勵行保甲嚴連坐無論爲盜窩盜濟盜訊得情實立置諸法計期月間斃匪逾百餘人十數年之枳棘一旦斬伐罄盡治亂國用重典公庶幾焉他如工廠縣道電話儲蓄會諸大端皆公所擘畫而創設者縣民至今便之故升任遼陽時民樹碑頌德焉

王鎬直隸文安縣人王孝子原之後也舉人大挑二等於光緒二十八年選授懷德縣訓導性醇謹待士以禮到任二年得未疾請告返里其自書楹聯曰十七世詩書門第三百年忠孝家風蓋實錄也

隆釗京旗人光緒庚子署懷德典史任拳匪肇亂有邢福者性桀驁自奉天主教尤橫行無忌時人心机隍福揚言曰小黑龍村聚教民數百不日即進佔懷德云公巡行市井適聞其言以其圖爲不軌也立稟縣置之法人人大快縣城卒賴以安

論曰典史微秩也位輕權小遇事不敢自擅當人情遑遽之際拳匪肆虐教民思逞宵小伺隙盜賊成羣縣成之危

迫在眉睫矣公竟棄經行權本刑亂用重之訓而出殺一警衆之舉卒致教民潛踪拳匪亦從此斂跡書云致治於未亂保邦於未危我有焉或謂邑侯范公殺之蓋殺之者范公而肇其謀者實公也茲特表而書之使後之任微秩者苟有益於地方一事自足千古奚以多爲

鄉賢

魏奉璋字襄臣咸豐七年入吉林學同治十三年援例納貢光緒二年貤封奉直大夫先時境內開墾未久昌圖廳亦未設學居民力穡者多鮮知誦讀間有鄉塾教讀者均外省人率多濫竽公則以啓迪後生爲務化疇昔之狃榛肇一方之文運實惟

公提倡之家居教授尤工舉業弟子稱盛一時其侄晉楨由進士官至即補道實公教底於成者門下士承其指授多騰達有至開府者士論榮焉

鄉土志

于鳳池原名文繡字西橋咸豐時入承德學嗣攷取宗室學漢教習期滿授教職歷任金州蓋州甯遠州教諭所至以正風化端士習爲要務性廉介而善講演每當訓示諸生時高談雄辯聲如洪鐘振聵發蒙令人心折故門下士咸廉隅自飭不敢蹈匪僻宦游數十年惟攜一僕自隨年六十請告卒年七十有一榮文達字可民號亮夫誕時公母夢紅蛇盤於床大逾車輪驚寤而公生公生而岐異聰穎殊常兒塾師不能授以課就學於

懷德縣志

卷九人物

二十三

新京福文盛印書局印

七百里外遼陽王燮臣先生公之父執也彼時家綦貧王奇公才不受束修然往返川資動虞不給以乞食爲常年十五爲村塾師十九昌圖初設廳治請學額廳試張芷生司馬得公卷大奇之曰吾爲國家得真才矣院試經古諸作傳抄殆遍大有洛陽紙貴之概癸酉科選拔十試於鄉癸巳始中副車居都門每試金臺書院輒列前茅故累試報罷而名動京師南方學者咸重之吾鄉同時與公齊名者爲遼陽房仲南新民劉東閣人稱爲遼東三才子識者首爲公屈一指焉公於經史詩文書畫諸學無所不窺皆能溯本究源深造有得從公受業者得公之緒餘多破壁飛去四弟文昭舉孝廉方正季弟文祚舉於鄉皆公

教也少任俠慕朱家郭解之爲人弱冠與遼陽董伯醇交始返求實踐以宋儒爲宗嘗曰聖人首重知恥人禽之判只此而已性和易待人以誠而不修邊幅疎懶成性髮經月不櫛面數日不盥敝衣汗垢履踵絕而束以繩遨遊於名公鉅卿文人學士之中坦然自若然狷介自持蒙藩之贈裘崇文山相國胡少宗伯之招致皆婉謝之終身進退必準於義理謂非足於中無待於外者歟初光緒甲申公以拔貢攷取盛京宗室學漢教習三年期滿引見以知縣分省試用或勸之仕慨然曰牧令撫一邑民耳人苟存心濟物稱力而施安必以令爲癸卯受大吏聘爲奉天大學堂總教習五月疾發卒於旅次生平著作强半散佚

畫尤罕見常熟孫師鄭選四朝詩錄公詩甚夥手書尙有存者時人得之珍逾連城云卒年五十有六鄉人私謚曰惠敏先生榮文昭字誼雲可民先生之四弟也有夙慧三歲能誦唐詩百餘首琅琅上口人咸異之年甫舞勺代人作春帖子老宿見而驚嘆同治癸酉年十四始入塾從師四年而通五經試冠一軍光緒庚辰補博士弟子員旋以高才生食廩餼秋闈屢躋五試不售有清定制每新天子御極特頒恩詔於各行省州縣令各選孝廉方正一人謂之制科詔辭嚴重應之者恆難其人宣統初元公爲邑宰及里所推得膺是選一時士論翕然謂公之制行允足當此四字而無愧也會遭國變益堅邱壑之志遂

不復出公事母時太恭人以孝聞迨太恭人棄養廬墓六年食必祭祭必思慕而泣六年如一日也公篤於手足嘗欲哀家庭唱和諸作顏慕墳簾集以紀其事公之著述從不示人光緒末葉邑侯聘著鄉土志考據精核當時推爲各縣鄉土志冠云卒年六十有一

孫嶽東字貢三府庠生幼穎異讀書求深造長游樂亭樊孝廉濟青門業益進工制藝尤善解經秋闈報罷遂設帳里門隱居不求仕進及門多雋才如趙郎中晉臣遲同知憲章皆先生之高足弟子也其弟嶽金現任吉林饒河縣知事亦先生手教底於成者得先生之餘緒者多拾青紫亦足徵先生之遺澤遠矣

卒年四十有八

趙鑑清字聲遠幼穎異讀書有神悟年十九劬書致疾遂治岐黃常謂吾人居里巷無所資以利濟醫雖小道苟善用之猶不失痼瘵在抱之意乃精研古今名家著述遇有患者無貧富必悉心診治即值疾不能書猶爲口授立方無厭倦意性剛方耿介內行修飭庭無間言值母疾默禱願減已算益親年侍湯藥不解帶者月餘生平辭受取予一介不苟嘗訓其子曰行已有恥及儉以養廉二語宜終身以之光緒五年邑初建學宮公與倡捐諸人經營監理秩序井然邑中向無義倉邑令奉檄飭屬積穀各社觀望公獨首捐若干石仿古社倉法春貸秋收推陳

易新行之數年衆稱便而積益富值歲饑邀里之多粟者合設粥廠俾資接濟所全甚衆庚子之變練餉無出當事移學款以濟事後無著縣責諸紳捐復或議此巨款須衆舉之公乃獨力勉措未嘗累里黨公著述默不示人嘗仿古人家訓作趁早言一卷後改爲耕禮堂家訓藏於家光緒末葉邑令聘修鄉土志筆頗謹嚴宣統初元特頒恩詔令州縣各選孝廉方正謂之制科公爲邑令及里所推得膺斯選公年六十時五世同堂又因次子晉臣由舉人官禮部郎中誥封資政大夫鄉里榮焉卒年七十有二

趙晉臣字迺唐幼不好弄靜穆異常人從邑中名宿孫貢三先

生學穎悟勤劬迺不猶人年十九入邑庠光緒戊子領鄉薦出蜀南施鶴笙先生房深加獎許自設縣後公首膺鄉選邑人咸引以爲榮時游都門試金臺屢冠其曹文名藉甚五上春官均額滿見遺照例可檢選知縣公不就光緒己亥膺昌圖陳太守濟蒼之聘主講榆城書院務敦實學祛浮華故成就者甚衆甲辰停科舉納貲爲禮部郎國變棄官歸里自號漁隱不復出項城當國召集國民會議邑令以公應徵公毅然辭不赴後聞蒞會者多被迫脅人咸服公之卓識云晚年居城中官吏罕覩其面偶有往還非先焉弗往也天懷冲淡不問家計善書於各體均遺其貌而得其神故邑人得之如拱璧焉著有耕禮堂家

乘一卷雜文若干卷詞一卷師竹齋吟草八卷詩經孫吏部師鄭選印三卷行世餘續梓刻公之作詩也始自禮部供職時際國步多艱政事日蠹公日覩神傷一有感觸輒寄咏歌以舒其胸中鬱結之氣論者謂辛亥以前各詩多淑性陶情之作辛亥以後各詩又變爲麥秀黍離之遺音也丙寅偶讀佛書有所悟遂精研淨土經籍弗倦乃自號蓮石嘗自作輓語輒詠司空表聖生壙詞以自況戊寅冬膺邑侯李公纂修縣志之聘發凡起例均有法則是歲十二月卒年六十有七

儒林

高香濤字秀三幼聰穎年二十一歲攷取附生後入書院肄業

二十六歲例取歲貢生甲午戊子兩次鄉試不中鄉居設教至光緒三十一年本地胡匪四起經慕縣尊委辦警察充北路總理光緒末年停科舉立學堂充縣立高等教員宣統初元創設自治本縣設立議董兩會經衆舉爲本區楊大城鎮議事會議長後赴江東墾荒歷三年回里協修縣志卒年七十

梁萬昌字豐年一字餘三法庫人幼而奇異至性過人入塾讀書過目不忘迫於家計乃學商勤敏冠儕輩壯年手刃仇人義俠之名震一時嗣來懷德營商業遂爲懷德人居年餘邑之縉紳莫不投契各商糾葛或鄉間之紛爭久不解者往往因公數言而猜嫌立釋懷德爲蒙古舊地蒙王聞而慕之委爲本邑東

公益地局局長二十餘年輿情頗愜公經商積貲鉅萬而自奉儉約凡所識婚喪醫藥之用則罔不周濟邑中書院學堂鄉團義倉諸善舉皆鼎力贊勸慨捐鉅款不稍吝公族孫梁中書藹卿甥孔參議郁吾皆公延師教授底於成者論者咸爲公有知人之鑒云餘見慈善志卒年七十有九

鄉型

張成邦城南頭道崗人性豪爽疾惡如仇有古俠士風道光初元草萊甫闢萑苻潛滋鄉民自衛時虞渙散咸豐時奉天將軍奕公劄諭四民准立團練以衛地方公乃遵諭糾合鄉勇剿匪除暴不遺餘力因而各鄉團練會應之推公爲總會首曾蒙科

爾沁博王面諭嘉獎昌圖廳倚爲東鄙干城遠近賴以安堵者數十年雖婦人孺子無不稱之曰張老會總云卒年八十有二

寓賢

樊城齊字濟青直隸樂亭縣人某科舉人懷德文風自先生來始昌制藝得陸潤生之神髓而啟迪後進則以不悛不啓爲宗故游其門者皆深造自得之才如本邑孫貢三奉化縣趙德軒皆能得先生之傳而傳焉者也及門之盛罕與比倫光緒初年應吉林長春府士紳之聘主長春書院講席而先生之教遂自西而東卒於長春書院時年六十各縣弟子聞訃贈賻甚鉅云

死事

唐玉和初名泰字際三初爲民壯班因事幾陷於法賴集亭張公力救始免於難後充捕盜營兵光緒十五年蒙賀公派帶練勇因捐助賑糧出力蒙軍憲定給七品頂戴十七年帶隊防禦朝陽坡教匪出力蒙賀縣尊稟請督憲裕賞給六品頂戴十九年十二月間蒙傅縣尊稟准署理捕盜營外委帶馬兵三十六名駐楊家大城子二十一年因日人犯順蒙傅縣尊派與欽差大臣宋購送硝磺火藥二月初抵錦州防所當蒙大臣賞給五品翎扎是年四月因捕獲巨盜曹二繚脚子蒙傅縣尊稟准賞給五品頂戴二十二年冬因督憲依裁撤捕盜營以致賦閒二十三年陳縣尊創立練營派公爲統練二十四年蒙于縣尊派

充團練總局練長二十五年秋因迭獲巨盜蔣永亭等蒙督憲增准以儘先把總存記十二月蒙高縣尊拔充團練總局統練節制馬步各團稟請立案是年及二十七年共擒著名匪多名蒙縣尊稟准以千總儘先備用並加四品頂戴三十一年督率警察各隊拿護著名巨匪盜四十餘名蒙廖縣尊稟准免補千總以守備儘先補用加遊擊銜三十二年七月間因盜犯大洛疙疸等久未就獲奉張軍門令調往勦賊於七月十九日在奉化縣之岡岡屯劉姓家與賊接仗槍子中腦後三日歿時年五十一歲也團練向無逾界勦賊者公之遇害鄰境或爲公惜然事聞於省督憲趙次帥即錫以忠勇可風之扁額以旌其門公

可謂得死所矣又何憾焉公雖讀書無多性甚機警與賊大小數十戰少有敗且勇於擊賊而嚴以御卒較夫假名討賊而慣於擾民豈可道里計哉後入本邑死事祠

鄉土志

列女

儒童王殿佐妻趙氏于歸三年夫病故氏時年二十四矢志守節孝順翁姑教子有方迨至五十一歲請准建坊

吳德明妻佟氏于歸時氏年十四夫亡時氏年二十三生一子自夫故後奉孀姑撫孤子以爲己任守節自甘矢志靡他躬親紡織親操井臼迨孀姑病故代夫喪葬盡哀盡禮持家勤儉教子成人氏病故時年六十三請准入祠建坊

高明泰妻姜氏年十七于歸事翁事夫克盡婦道夫病故時氏年二十七生有三子家貧子幼矢志守節躬勤紡紉日無暇晷迨翁身故喪葬竭盡禮節衣皆縑縷食悉粗糲人所不能堪者氏獨處之晏如而且教子耕作至於成人力爲婚娶以重宗嗣厥後家道稍裕皆由氏勤儉教養之功也計守節四十年請准建坊

唐世顯妻張氏十五歲于歸至二十九歲夫病故生一子一女翁姑俱存指氏矢天白願守栢舟之節奉養雙親撫育幼子貧無恆產惟恃紡織以供二老衣食及翁姑歿時喪葬盡禮且教子玉和成名誠巾幗之完人也計守節四十五年請准建坊

李桐之妻安氏二十一歲于歸翁姑雖歿事伯叔之父母如己翁姑二十四歲夫病故而氏無所出矢志守節百折不回以夫之胞弟李枝次子爲嗣年方五歲氏殷勤教養至於成立守節三十八年請准建坊

周明先之妻陳氏年十九于歸次年夫故夫家母家以氏青年無出均有始易終難之慮而氏矢志靡他敬事翁姑以夫胞弟周繼先之男聯甲自襁褓中過繼爲嗣氏鞠養周至愛逾己出守節四十三年請准建坊 鄉土志

索禮之妻張氏索坤之妻潘氏姒娣也張氏于歸八年夫歿守節計三十九年索坤之妻潘氏于歸十二年夫歿守節計三十

八年一門雙節古所稀也請准建坊

張福修之妻王氏于歸四年二十四歲夫沒守節生有遺腹子名書紳氏鞠養教訓至於成立學校畢業後歷充學警各差計守節四十年民國十六年請褒蒙褒以節勵冰霜匾額